

DISSERTATIO COSMOLOGICA,
DE
CONTINGENTIA
MUNDI
CONSTITUTIVA
ET CONSECUTIVA.

QUAM

PRÆSIDE

Israel Gottlieb CANZIO,

P. P. O. ILL. STIP. THEOL. TUB.

EPHORO,

D. JUN. ANNI MDCCXLVI.

IN

AUDITORIO PHILOSOPHICO

H. L. CONSUETIS

PRO RITE

CAPESSENDIS SUMMIS IN PHILOSOPHIA HONORIBUS

PUBLICO COLLOQUIO EXPONERE VOLUIT

AUCTOR

GOTTHARDUS FRIDERICUS FABER,

KIRNBACENSIS. SER. STIP. ET MAG. PHILOS. CAND.

TUBINGÆ,

LITERIS JO. HEINR. PHIL. SCHRAMMII.

58700(4)





§. I.



Mne Ens, quodcunque in toto hoc universo continetur, ita comparatum est, ut ad ^{Necessarium.} duas potissimum partes revocandum sit, adeoque necessarium sit vel contingens. Quoniam vero tota hæc commentatio circa contingentiam Entis maxime versetur, illa vero sit opposita necessario; opus erit antecedanea explicatione necessarii, & deinde contingentis. Nimirum illud omne necessarium dicitur, cujus oppositum involvit contradictionem vel manifestam vel tacitam; cum vero id quod contradictionem involvit, plane sit impossibile; sequitur, omne illud, quod necessario opponitur, legitime dici impossibile; sed quando id quod rei cuidam opponitur, est impossibile, eo ipso res evadit necessaria. Atque sic omne possibile in se spectatum est necessarium; si sc. possibile non simul potest esse impossibile, per princ. contrad. sed Essentiæ rerum omnes in possibilitate versantur, idcirco sunt necessariae, adeoque ex essentiis rerum omne necessarium proficiscitur. Quotiescunque igitur de necessario loquimur, tum de essentiis rerum præcipue sermonem institui, præmonitos velim lectores, quoties autem de contingentibus differimus, tum de existentia rerum; quæ quidem duo probe debent discerni, quoniam illæ quidem sunt necessariae, hæc vero contingens est.

§. II.

**Definitio
contingen-
tis.**

Contingens igitur generali definitione illud omne nominatur, quod necessario opponitur vel cuius oppositum existere, non repugnat. Quamvis igitur simul esse & non esse nihil possit; in eo tamen contingens differt a necessario; quod si hic & nunc aliquid existat, natura tamen sua etiam non existere, vel sub aliis circumstantiis aliquo modo potuisset. Adeoque Ens contingens appellatur, quod in essentia sua sic fundatur, ut ad existentiam plane sit indifferens; sed ad cuius existentiam requiritur aliquid amplius ab illo Ente realiter distinctum; quale autem illud sit, inferius patebit; illud hic sufficiat, Ens contingens posse existere, vel non existere salva essentia.

§. III.

Corollarium,

Ex hac notione sequitur, Ens contingens ab Ente simpliciter necessario atque infinito facillime distinguí posse; infinitudinis enim notio requirit, ut tale Ens, quidquid habet, cum omnitudo compossibilium habeat, & absolute quidem: existentia vero compossibilis est ceteris perfectionibus, & est in Ente infinito perfectionis loco; igitur illud Ens necessario existit, quoniam contradictorium est, infinitum esse, & posse non existere. In contingentibus omnia secus habent; differt igitur Ens finitum ab Infinito, uti contingens a necessario.

§. IV.

**Mundus in
concreto.**

Mundus nobis est universitas rerum spatio & tempore connexarum. Spatio connexa dicuntur, quæ simul existunt; tempore vero conectuntur, quæ successive, uti effectus a causa, procedunt; ex quo pendet, quod & antecedentia, & præsentia atque futura constituent unum eundemque mundum. Jam si præsentem aliquem cum antecedaneo temporis articulo conferamus, tum vero magnum inter utrumque discrimen

scrimen reperiemus, atque mirandas mutationes, quod quemvis experientia docet, optimus magister: cum vero ab existentia ad possibilitatem jure concludamus, apparet, hunc mundum esse mutabilem, atque hunc vel alium esse posse sine idearum repugnantia; hinc mundus est series rerum mutabilium, quæ sui rationem metaphysice sufficientem habent; attendamus jam ad illa generalia, quæ omnibus rebus existentibus competunt, ut illam rationem determinare queamus, aut igitur illa ratio consistet in essentia vel in existentia rerum; sed essentiæ rerum sunt necessariae, hinc æternæ atque prorsus immutabiles, hinc in essentia rerum ratio mutationis esse non potest. Relinquitur itaque existentia, quæ sola rerum modos atque mutationes infert; hæc vero quoniam sui rationem sufficientem in se ipsa non habet, illam ponit in alio. Quod sui rationem in semet ipso non habet illud vocatur contingens; igitur mundus est contingens, vel in toto suo ambitu spectatus, est universitas rerum contingenter existentium.

§. V.

Jam demum putem intelligi posse, quid sit contingentia in abstracto mundi, in abstracto considerata; quod nimirum sit ipsa compositio rerum contingenter existentium, quatenus etiam alia potest esse: quatenus ista compositio in sua possibilitate spectatur, tanquam certa combinabilitas rerum contingentium, eatenus essentiam mundi nobis repræsentamus. Recedimus autem in ista essentiæ definitione a Cartesio, qui illam in extensione sola collocabat, dum materiæ notionem cum essentia rerum corporearum confudit.

§. VI.

Illud velim probe hic discernant Lectores, duplicem hac ratione contingentiam in conceptu mundi apparere; pri- Divisio The-
ma quidem iterum in duos ramos abit; potuisse i.) mun- matis,
dum vel existere vel non existere (creari hic nondum licet dicere,

dicere, quoniam illius notio evolvenda deinceps erit) 2.) potuisse generaliter hunc vel alium mundum existere, quamvis optimus proximo jure ad existentiam accedat. Secundo, quamvis hic sit nexus mundi constitutus, illum tamen contingentem esse quoad singulos temporis articulos. Ad hanc, inquam, differentiam probe attendendum esse, cum tota hæc commentatio illo veluti fundamento nitatur. Primum enim quod attinet, probandum nobis erit, potuisse Deum etiam libertatis usu mundum quoque non producere, quod ex Idea Entis infiniti magis apparebit; secundo ita constitutum esse mundum, ut in successione sua nexus semper possit miraculo suspendi; nimirum quod titulus paginæ ostendit, mundum hunc esse in constitutione, & consecutione sua contingentem.

§. VII.

Pars I.
Mundus
quoad partes
suas essentielles.

Jam ad primam partem propius accedimus de constitutione mundi primum visuri. Duplex nobis via patet, evolvendi generalia omnia quæ hunc mundum constituunt, una dicitur experientia, altera vero recta ratio. Per experientiam dicimur cognoscere ea, quæ in nostris organis sensoriis mutationes quasdam proferunt; objecta scilicet externa, sed non nisi singularia; per rectam vero rationem res tantummodo cognoscimus interveniente bono ratiocinio; sic & simplicia mundi Elementaria, & spiritus, inprimis vero animæ nostræ existentiam intelligimus, non immediate quidem sed rectæ rationis ope. Ex quo duplici cognitionis humanæ modo facile nobis persuademus, mundum partim esse corporeum partim incorporeum; de utroque seorsim erit differendum.

§. VIII.

I. mundus
corporeus
quisnam?

Mundus corporeus vel consideratur uti mutatio rerum contingenter existentium, quemadmodum in motu ponitur; vel ut adspectabilis, quatenus sensibus nostris occurrit; priorem casum in altera tractationis parte evolvemus distinctius, posteriorem hic tenebimus. Sensu percipimus res ut extra nos positas, sed non nisi res compositas sentimus, dum compositi

positi partes extra partes nobis repræsentamus, atque extensi ideam formamus; jam vero quælibet pars novum compositum ipsa est, atque ista in novas partes tam diu potest resolvi, arte humana, quam diu sensum non effugit. Quamvis igitur ad vivum refecari hæc composita non possint, mente tamen concipimus, uti Mathesis rectissime præcipit, posse virtute saltem Divina compositum quoddam ita resolvi, uti ortum fuit nimirum in simplicia, compositum enim vi vocis est, quod constat ex simplicibus.

§. IX.

Antequam ulterius provehar, monendi hic videntur Lectorum nonnulli, ne si audiant compositum aliquod primi gradus, & immediate ex simplicibus ortum a phantasia illud sibi patiantur, & confundant illud cum composito aliquo visibili, cum sit diversissima utriusque ratio. Cujus si ideam paulo accuratiorem formare nobis velimus, simplicia comparemus singula cum unitate Mathematica, compositum e. g. cum ternario; qualis igitur erit ratio ternarii ad tres unitates, ex quibus resultat; eadem erit ratio compositi ad sua simplicia,

Monitum

§. X.

Mundus igitur est compositum, constans ex infinitis aliis compositis, quæ denique resolvi possunt in simplicia; sed tali modo res dissolvitur, quo fuit orta, igitur ex simplicibus fuit ortus hic mundus. Jam vero si contingentem esse mundum corporeum statuemus, necesse est, prima ejus Elementa esse contingentia; faciamus igitur rei periculum. Simplicia dicuntur, quæ partibus carent. Oritur res, quæ existentiam accipit vel in instanti, vel successive conjunctis iis quæ ingrediuntur rei essentiam; simplicia nullas partes admittunt, igitur in instanti oriuntur. Non autem ex composito oriuntur, quippe alias in composito, uti pars illius, debuissent præexistere; neque vero ex alio simplici possunt oriri, quoniam omne simplex caret partibus; neque ex alterato, nam diversæ qualitates novi entis existentiam non inferunt. Igitur simpli-

Simplicia
in se sunt
contingen-
tia,

simplicia sui rationem physice sufficientem in nullo præexistente habent ; hinc ex nihilo oriuntur. Neque id vero omni ratione caret, quod materiali caret, adeoque sic explicandus est ortus simplicium, ut realitatem existentiae habeat ab alio, id, quod in sese nullam habet realitatem, vel ut creari simplicia cogitemus ; potuissent igitur simplicia etiam non existere per se, & consequenter illa inter contingentia referre licet.

§. XI.

Occurritur
objectioni,

Ens simplex est unica quædam substantia, compositum est plurium substantiarum aggregatio. Simplicium quidem respectu facillime hic dubium aliquod subnasci posset ; si quidem substantia, veterum definitione, dicatur Ens per se existens, atqui dicis, Ens simplex est substantia, E. per se existit, conseq. necessarium quoque est ; explicatio igitur hujus phraseos valde erit idonea, quæ hic attingatur. Nimirum duplici respectu potest dici ; per se existit, quod fundamentum existentiae suæ habet in se ipso, & cujus existentiam essentia includit ; atque hoc respectu solum Ens infinitum existit necessitate nimirum absoluta ; vel alio sensu per se etiam existit, quod principio quodam interno activum se comprobare, suamque existentiam momentaneis speciminibus confirmare nititur ; quamvis hic de causa efficiente prorsus abstrahamus. Hoc modo putem intelligi posse, quid sibi velit phrasis illa per se existere ; non hic anxie requirimus, in quonam consistat illa vis activa simplicium, & quo jure fruatur perceptio simplicium Leibnitiana, quoniam hæc non sunt hujus loci: Confer, Ridigerus de sensu veri & falsi L. I, Cap. V. p. 38.

§. XII.

combinatio-
nis modus
quoad exi-
stentiam est
contingens,

Vidimus simplicia extra connexionem suam esse contingentia ; facilis jam est argumentatio, quoniam de mundo corporeo dicimus ; simplicia per se sunt contingentia, sed quæcunque sunt in regno Corporum, oriuntur ex illis, E. respectu simplicium mundus est contingens. Jam porro : plura simplicia

plia constituunt unum quoddam compositum singulare, eo modo, quem §. IX. allegavimus; quoniam vero omnia composita ex illis oriuntur, saltem in modo compositionis different; quotquot igitur modi compositionis sunt possibiles, tot erunt diversa composita. Simplicia autem non existunt necessario; hinc nec compositio erit necessaria; nam essentiarum sunt necessariae per se tantum, non quoad existentiam. Proinde etiam ratione singulorum compositorum mundus est contingens. Omnia composita simul sumta tam successiva quam simultanea constituunt unum eundemque mundum, singula autem contingenter existunt, igitur potuit mundus etiam non existere; sed quoniam omnia non necessario eodem ordine juxta se sunt posita, & sibi invicem succedunt; sequitur, & alium combinationis modum potuisse eligi; consequenter mundum etiam potuisse alium existere; hinc apparet mundi contingentia ratione constitutionis, duplici respectu, 1.) quod potuerit non existere, 2.) quod saltem alius potuisset in medium prodire.

§. XIII.

Sed nondum tamen ab omni suspitione nos liberavimus; sed amolienda quædam est objectio. Sunt, qui animo concipere nequeunt, existere quidquam posse, quod omni causa materiali careat; & proinde rationem physice sufficientem assumunt, pro ut visum fuerit; hinc enata fuit æterna quædam materia, imaginationis filia, seu compositum aliquod, quod sui rationem habet in seipso, & cujus partes sunt mutabiles teste experientia. Sed evoluta definitione facillime dispalescet error. Tale quoddam compositum, qualecunque demum fuerit, necessarium est, quoniam existentia suæ rationem habet in se ipso §. III. hinc & immutabile est; sed quoniam partes illius possunt esse mutabiles, contradictio aperta est; mutabilitas vero infert contingentiam; sit autem talis materia per hypothesin absolute necessaria, tum mera prodibunt contradictoria. Est igitur hic mundus in se spectatus contingens tam quoad partes componentes, quam secundum ipsum compositionis modum.

Materia
æterna,

§. XIV.

II.
Regnum
spirituum,
ubi I.) con-
tingentia re-
spectu crea-
toris evolvi-
tur.

De mundo corporeo diximus ; jam ad regnum spiritu-
um patet transitus ; quibus libertas, sæpius desiderata, debet
restitui ; neque enim libere creasse Deum, concedunt ii,
qui secus sentiunt, neque spiritus finitos pro arbitrio suo pos-
se liberas actiones edere fatentur : & quoniam utrumque
crimen maximi momenti est, videamus primum de Deo ; caus-
samque ipsius circa creationem mundi pro angustis ingenii hu-
mani limitibus suscipiamus defendendam. Mundum hunc esse
contingentem vidimus §. IV. conseq. rationem existentiaæ suæ
ponit in alio, cui infinita virtus necessitate competit intrin-
seca, quem Deum vocamus : ratio igitur sufficiens, cur Deus
hunc mundum existere potius quam non existere, maluerit,
aut in ipso Deo quærenda est, aut extra Deum ; posterius non
est, nihil enim reale extra Deum fuit, quod rationem mun-
di in se continuisset ; igitur a nullo Ente, extra ipsum posito,
determinari Deus potuit ; igitur in Deo ponenda est illa ra-
tio existentiaæ mundi, atque sic Deus est causa mundi. Si
ratio mundi sufficiens in ipso Deo quærenda est ; tum vel ad
essentiam Divinam referenda erit, vel ad liberum perfectissi-
mæ voluntatis exercitium ; si ad essentiam Divinam pertinet,
tum vero novæ acquirendæ realitatis gratia Deus creasset,
quod est contradictorium ; Deus enim est אֱלֹהִים Ens sibi
ipsi sufficientissimum ; quidquid igitur realitatis titulo venit,
necessario in illo locum debet invenire, qui, ceu Ens infini-
tum, omnes compossibiles perfectiones simul possidet ; igi-
tur libera voluntas Dei illam in se rationem continet, cur
hic mundus existat ; proinde etiam non creare, vel alium
creare mundum Deus potuisset, quod de contingentia mundi
luculentum affert testimonium. Nihil nos morari debet illa
cogitatio, ac si Deus nullis actionibus efficacem se præbere
potuisset, non condito hoc mundo ; absit longissime ! quip-
pe semet ipsum adspiciens jam fuit actuosissimus, & sibi ipsi
beatissimus ; neque aliud objectum externum actionibus Dei
erat destinandum. Videmur in nobis ipsis aliquod habere
simu-

simulacrum atque vestigium hujus voluptatis Divinæ ; si quidquam perfectionis nobis inesse sentimus, quamvis nihil ita sit purum, quin ei aliquid humani atque imperfecti sit admistum. Instabis igitur, quodnam sit illud motivum, ob quod Deus creare maluerit, cum ipsi nulla nova realitas accesserit ; saltem inquam, ideo creavit, quia convenientius ipsi videbatur creare, quam non creare. Patebit id clarius, si notionem libertatis Divinæ perspexerimus.

§. XV.

Afferimus primum Deo infinito summam quoque & infinitam agendi potentiam. Quidquid enim Deus habet, illud sine gradibus habet, adeoque nihil imperfecti turbat ipsius perfectiones ; igitur omnia possibilea subjecta sunt potentiae Divinæ ; sunt vero complures adhuc alii mundi possibilea, hinc & alium generali sensu potuisset eligere, hoc posthabito ; ex quo jam deduximus mundi contingentiam ; potest vero Deus ad hunc usque diem illa omnia, quæ in creatione præstare potuerat ; igitur & hodie potest aliter agere, nexumque hunc vel alium quemcunque constituere. Et quoniam facultati Divinæ semper etiam compossibilis est actus, hinc etiam semper agit : actuosus fuit ab æterno §. XIV. in creatione fuit actuosissimus, & quoniam conservatio ipsa est creatio, semper adhuc agit. Secundo autem ipsi innuitur potentia illimitata, nec externo quodam circumscripta principio ; a se ipso enim habet, quidquid habet, Deus ; neque præter ipsum quidquam est, quod eum ad actiones certas adstringere aut determinare possit ; cum enim id, quod aliquando non existit, etiam non necessario existat, patet, ante concessam possibilebus realitatem nihil habuisse Deum, quod ipsi se, ad creandum obtruserit ? id quidem veritati consentaneum est, posito Deo, semper quoque poni possibilea, ex ipsis nimirum essentia profecta, illud tantummodo dici non debet, competere ipsis præcipuam quandam dignitatem, cujus intuitu creationem fuissent merita ; hinc prorsus & absolute independens

Probat
ulterius.

dens est Deus ab omni externo principio. Tertio autem ita agit Deus, prout suaserit divina omnium rerum cognitio; talis autem Cognitio, quæ est longe profundissima, optimum facillime detegit; cum enim omnia possibilia sibi Deus præsentet, perspicit etiam discrimina atque prærogativas, quibus alia præ aliis gaudent; sed illa cognitio, qualis est divina, semper cum conatu conjuncta est proferendi optimum, lege sapientiæ summa & immutabili; nec tamen exinde Deus agit necessario, quia optimum agit; dantur enim plurima alia, quæ simul sunt eligibilia; creavit igitur Deus in sapientia sua liberime.

§. XVI.

Finis creationis non necessitat,

Duo adhuc supersunt, quæ circa creatorem Deum quæri solent, nec injuria; primum illud est, quidnam sit internum illud motivum, ex quo Deus creare maluerit, quam non creare, respeximus ad hanc quæstionem jam supra §. XIV. & huic loco reservavimus. Ens sapientissimum optimis finibus commodissima adjungit media, quærendus igitur ille finis nobis est. Qui gloriam Divinam pro ratione sufficiente assumunt, illi tutissima via ingrediuntur; quippe gloria Dei est æterna illa Dei dignitas, ut cognoscatur atque ametur; dignitas ista ortum suum trahit ab omnitudine perfectionum, quibus gaudet Deus; quas si simul concipiamus animo, quamvis revera comprehendere illas humana imbecillitas non possit, insignia tamen illarum perfectionum vestigia deprehendemus; eaque norma & potentiam Dei ex effectu, benignitatem ex innumeris fructibus atque commodis, sapientiam ex illis, quæ spatio connexa sunt, ex istis autem omnibus existentiam conditoris admirabimur. Sed cum duplex sit mundus generaliter spectatus, corporum atque spirituum regnum; duplici etiam respectu patefacta est hæc divina gloria; & est divinorum attributorum fructus penes res inanimatas, sensus autem illarum penes res animatas obtinet. Sic Deo convenientius erat creare quam non creare, nimirum respectu exercitii perfectionum divinarum, quatenus illud in patefacta-

tefactione gloriæ divinæ satis luculenter se exeruit; cum autem in tali Ente, cujus intellectus est purissimus, exercitium quoque sit liberrimum; patet mundum, ut objectum hujus actionis divinæ, non existere necessario.

§. XVII.

Alterum, quod quæri hic solet, illud est, quod plerumque nobis obversatur, si cogitamus, aut ab æterno Deum creasse, quoniam ob gloriam suam creaverit; adeoque hunc mundum esse necessarium; aut in tempore Deum creasse, & propterea successionem in Deo dari saltim idealem. Distinguendum igitur hic est inter gloriam Dei internam atque externam; interna consistit in simultanea possessione perfectionum omnium, externa vero in perfectionum patefactione consistit; illa necessaria, hæc contingens est; quoniam vero sensu posteriori Deus creavit, igitur non necessario creavit. Sed ab æterno creavit, si sano tantum sensu accipiatur; & sub illo tantum æternam plurium Entium successionem atque seriem intelligas; atque sic servatur omnino contingentia: quæ essentialiter supponit Ens absolute necessarium. At vero si ab æterno esse tantundem tibi sit ac æternum esse; tum vero immutabiliter atque necessario æternum esse mundum facillime imaginatio persuaserit, & æternæ materiæ vanam notionem menti parum attentæ suggesserit. Quid vero vires istæ sociæ ad Deum infinite potentem? Sed notior est illa contradictio, quam quæ longius enarretur. Sed etiam qui rectius sentiunt, sæpius tamen temere in errorem incidunt, dicentes: Deum creasse in tempore, quæ quidem loquendi formula satis vagam prodit ideam, citius enim creari mundum potuisse statuunt, & concipiunt sibi tempus ante seriem rerum successivarum, adeoque primo homine priorem fingunt. Similis est judicii lapsus apud illos, qui spatium cogitant ante mundanum, vacuum materia, cui velut implantatæ fuerint res creandæ. Sed non video, quid obftet, quominus cum tempore creatum esse hunc mundum statuamus;

Et qui æternitatem mundi non probat.

Cautela.

certe in periculum absurdæ thesæ non incurremus ; neque id, quod multis videtur , Deo inferre necessitatem potest. Infinito Deo omnia semper adsunt, neque id illi licet affingere, quod satis angustum efficit humanarum rerum terminum, tempus, puto , successivum ; apud homines id limitationis est, quod nunquam duas res simul, sed omnes successive faciant, viribus uni saltim rei sufficientibus. A Deo omnis limes exulat. Perfectionis loco est apud nos, si distincta rei repræsentatione præcedente, decernamus quid agendum sit; perfectione naturali; Ens infinitum neque ratiociniis neque aliis humani intellectus adminiculis æternum & vidit & decrevit hunc, quem palpamus mundum, quamvis cum tempore productus demum fuerit. Illud sine nota prætermittere hic non possum, quod passim in scriptis invenias : ubi Deus repræsentatur ut spectator omnium possibilium, conferens singulos compositionis modos ex illis oriundos, qui absoluto hoc examine illum deligat, qui potissimum sit præferendus aliis; magnopere falluntur, qui successive id factum esse somniant; longeque accuratius alii sentiunt, qui factum hoc esse uno intuitu omnium possibilium ex notione sapientiæ Divinæ interpretantur.

§. XVIII.

III.
Spiritu-
2.) finito-
rum actio-
nes sunt
contingen-
tes.

Hucusque perspeximus, mundum & in sese & respectu auctoris sui esse contingentem; sed quid si concedant nobis adversarii, mundum corporeum esse contingentem; quamvis id nullus Spinoza factitaverit, & agentibus intelligentibus necessitatem conentur inferre. Præstandum igitur promissum erit, initio §. XIV. factum, & num ex contingentia mundi contingentia actionum humanarum possit erui, dispiciendum. Competit autem hoc argumento: quidquid existit, illud existentiam suam agendo demonstrat; ratio sufficiens actionum repetenda est vel altius a primo illo momento, quo existere animam Deus voce dictatoria jussit, principium illud internum addidit, naturæ spiritus apte respondens; vel specialius deducenda est hæc ratio ab objecti hujus vel illius diversitate

fitate. Talis igitur naturæ omnes erunt actiones animæ qualis est existentia, quoniam hæc se per actus testatur; & proinde si existentia erit necessaria, tum vero etiam actiones humanæ possunt esse non liberae: cum vero probatum sit hætenus, contingentem esse hunc mundum generaliter ex notione Dei; quod non tantummodo mundum corporeum attingit, sed omnes mundi partes essentielles, patet, & animam in electione sua esse liberrimam, & actiones ipsius manere contingentes. Confiteamur nos quidem, principium illud internum, quod in vi repræsentativa universi consistit, ita comparatum esse, ut necessario nobis res repræsentemus, quamvis necessitate hypothetica, non absoluta; neque enim in potestate nostra situm est, num animo velimus res præsentem sistere; nec potis est, præcipere, qualis res repræsentanda esse debeat; neque enim minus necessariae sunt repræsentationes quæ mutationes, quas in organis sensoriiis experimur: sed quid demum inde sequitur, num igitur etiam voluntas se determinabit necessario? non arbitror. Voluntatis enim est, applicare attentionem ad præsentem sensationem, vel ad unam præcipue partem; voluntatis sub imperio est, imprimis ejus, quæ abstractionibus dudum se exercuit, ita negligere unam rem, ut plane non oblata videatur, & studiose illam cum aliis confundere; in eo nimirum casu, ubi ingrata nobis res obversetur; si vero nobis objectum obversetur ut bonum, nobisque congruum, tum eam, quam fieri potest distinctissime, contemplamur. Atque ipsa hæc facultas, quæ est præcipua voluntatis affectio, vocatur libertas; ex quo valde perspicuum est, quomodo libertas competat voluntati. Conf. si placet, Ill. Dn. Bilfingeri Dilucid. Sect. III. cap. II. §. CCLXXXVI.

§. XIX.

Ad contingentiam actionum igitur pertinere videmus agens quoddam intelligens; quatenus libertas est voluntatis affectio, hæc vero ad examen intellectus revocat omnia; atque in eo quidem longe adhuc excellentiorem puto animæ liber-

Requisita
contingen-
tiæ actio-
num.

libertatem competere, quam mundo isti corporeo contingencia tribuitur; in hoc enim, quotiescunque partes certæ concurrunt ad constituendum aliquod tertium, ea res certissime enascitur; hic vero, quamvis intellectus distincte sibi repræsentaverit convenientiam rei, ex voluntate tamen pendet, num exequi prævisa, & sensationes novas velit producere; ex quo iterum patet, contingentes esse actiones ejusmodi. Cum autem nihil sine ratione sufficiente fiat, præcipue autem intellectus eam veluti quadam trutina ponderet; apparet, semper obversari humano intellectui talem quandam rationem, qua perspecta voluntas vel decernat vel suspendat actionem; interim tales rationes nunquam sunt ejusmodi, quæ absolutam necessitatem decernendi inferrent. Fieri autem potest, ut voluntati gravissimæ adsint rationes ad agendum aliquid, cum velut ab improvviso accedant aliæ non minoris momenti ad omittendam actionem, forsitan exulabit hic libertas? notandum igitur est, subitanæ sæpe occasionem, quæ dubitantibus sese offert, esse loco rationis sufficientis, quæ rationem determinet. Ponamus e. g. serenum esse cœlum, toto nubes cœlo diffugisse, prata nunc vario florum genere ornari, oscinum cantu totiusque telluris amoenitate omnia velut ad vitam revocari, fac, in mentem tibi venire, exspatiari te in campos velle: oriatur subito negotiorum recordatio, temporis pretiositas in mentem revocetur, inprimis etiam illa molestia, quæ e nimio solis ardore capiatur; suspensam ista cogitationes mentem teneant, cum præter spem occasio subnascatur, cui indulgeas atque locum concedas. Memento hæc fingi; quoniam nunquam animus in utramque partem inclinat perfecto quodam æquilibrio; neque tanta est in objectis æqualitas, ut casus perfectæ æquivalentiæ rationum possit existere. Sequitur autem ex his, non sufficere, ut res quædam in se sit contingens; requiritur ut etiam posita conditione tamen adhuc sit contingens; alias enim quotiescunque illa conditio ex statu antecedente sequeretur, semper fieret actio necessario. Partes igitur libertatis, in centro exhibitæ, sunt hæ: ut primo adsit substantia agens intelligens; secundo, ut actio in se sit contingens, ut sit tertio
hypo

hypothetice contingens. Atque sic intelligitur definitio libertatis, quæ dicitur facultas, qua positis omnibus ad agendum requisitis substantia intelligens potest agere & non agere, agere hoc vel aliud.

§. XX.

Dicis : at vero vir bonus nihil potest agere præter id, quod fas est ; nihil potest velle, præter bonum & honestum, repugnat, eum aliud, quam rectum agere : fortassis hoc argumentum hominibus, quin immo prudentissimis inferre necessitatem potest. Equidem de hac re sic existimo : vir bonus necessario debet optimum agere, conditionate, quatenus viri boni titulus in illum quadrat ; quemadmodum bonus logicus falli non potest qua talis, potest autem vitio intellectus humani : sic vir honestatis amans officia virtutum necessario exequitur, quatenus amat honesta ; generali autem & Ciceroniano sensu potest vivere, ut vult. „Quid est enim, ait „Cic. Parad. V. §. IV. quid est libertas ? potestas vivendi, ut „velis. Quis igitur vivit ut vult, nisi qui recta sequitur, qui „gaudet officio, cui vivendi via considerata atque provisa „est ? „ Equidem facillime credo hanc ideam conciliari posse nostræ, quam dedimus, definitioni. Agnoscit vir summi ingenii, libertatem sese ad voluntatem accommodare, videt autem insimul, voluntatem sese nunquam exserere, nisi vivendi via (seu actiones humanæ) considerata ab intellectu atque provisa sit. Constituit igitur, hominem intellectu suo utentem probe considerasse vivendi viam, atque libertatem esse facultatem, pro cognitione sua eligendi optimum. Atque ex hac notione Cicero idem conatur efficere, quod nostra ætas agnoscit, nisi sapientem liberum esse neminem ; quo enim quisque est sapientior atque perspicacior, eo plura possibilia media perspicit, quibus finem suum exsequatur ; & si omnia perspicere posset media, esset profecto sapientissimus ; eligit enim unum relictis ceteris, quamvis ea eligat, quæ sibi videntur accommodatissima. Ita & Deus & homines, ad similitudinem Dei effecti, sapienter simul & libere eligunt, & eligere possunt.

Necessitas
moralis,

§. XXI.

Corollarium

Atque sic primam Tractationis nostræ partem de contingentia mundi, quoad constitutionem ipsius, ad finem perduximus. Quis jam ex hisce omnibus mundi necessitatem absolutam, quis brutam omnium rerum concatenationem elicere possit? vidimus, mundum in se esse contingentem, & præter essentiam suam nihil æterni habere; & proinde figmentum de materia æterna, rudi illi indigestaque mole, in auras dissipari. Neque vero etiam ex parte Auctoris sui mundum esse necessarium intelleximus; non respectu gloriæ Divinæ, nec acquirendæ novæ realitatis causa, quippe quæ erat impossibilis; quidquid autem in se, & respectu causæ suæ efficientis est contingens, illi revera contingentia ratione constitutionis competit. Fatum igitur absolutum hic proscriptum est. Sed quid si naturæ auctorem negare quis audeat eo, quod omnia ex innumeris confluxere atomis? periculum non est, ne quis hanc cramben velit recoquere, uno prudentiorum ore toties explosam atque extinctam. Transseamus igitur via satis spatiosa ad alteram Tractationis partem, quæ ex prima immediate fluit, ostensuri, mundum hunc esse etiam in consecutione sua contingentem.

§. XXII.

**Pars II.
Nexus uni-
versalis quo-
tuplex.**

Quoniam nunc de mundo ut existente, rebusque maxime necessariis instructo loquimur, igitur generale illud Principium de rebus existentibus erit præmittendum: quod nihil sit sine ratione sufficiente; vel quod præcipit, quotiescunque de re quadam certiores facti simus, semper aliquid adesse, ex quo cognosci possit, cur ea res potius sit quam non sit, cur hæc sit, nec alia; quam ob rem in toto hoc universo conspici nihil potest, quod non sui rationem sufficientem habeat, & quamvis ea non semper explicari possit ab hominibus, divino saltim intellectui ea obversatur. Nimirum in toto hoc universo cohærent omnia nexu quodam continuo
atque

atque indivulso, nexus autem universalis in illis rebus obtinere tantum potest, ubi semper ex uno intelligas, cur sit alterum vel in spatio cum aliis rebus simul, vel in successione rerum contineatur. Duplicis autem generis est universalis ille nexus; alius nimirum nexus est spirituum, vel corporum alius; nexus spirituum iterum ex duplici fonte derivatur, & est vel Logicus, prouti repræsentationes ex repræsentationibus oriuntur, vel moralis, ubi relatio voluntatis ex antecedanea repræsentatione spectatur; sed profundissime hæc omnia Ill. Bilf. Diluc. S. II. C. II. Nos hic de nexu mundi corporei sermonem instituimus; atque mundum exinde interpretamur per eam relationem omnium rerum ad se invicem, vi cujus unum in se continet rationem sufficientem, cur existat alterum:

§. XXIII.

Electo semel inter plures alios possibiles hoc mundi complexu facile apparet, omnia, quæ ad nexum hunc ut partes illius pertineant, possibilia certo esse eventura; adeoque illud omne, quod in hoc nexu rerum universali sui rationem sufficientem habet, vel jam existit vel antea jam existit, vel adhuc eveniet; omnia autem existentia ex duplici latere spectari possunt, vel ita, uti in certo quodam ordine rerum simul existentium continentur, vel uti pluribus mundi vicissitudinibus antegressis oriuntur demum. Si consideremus objectum aliquod in relatione plurium simul existentium positum, unicum hoc sic referetur ad cetera, ut nullum aliud eodem respectu simul existat, atque hac ratione oritur generale discrimen inter res creatas omnes, & individua cognoscimus; quæcunque enim spatio connexa videmus, ea non nisi in singulis individuis sensu percipimus; sed id, quod sensus percipit, variis nimisque multis circumstantiis vestitum videmus atque involutum, & proinde illud determinare possumus; plurima enim discrimina, tam interna, quam externa, indicare possumus, quibus unum ab altero differat. Concipi vero simul potest, quo sensu accipiatur principium illud

1) Ratione
spatii.

Leibnitianum : non dari duo perfecte similia ; quoniam loco saltem atque tempore distinguuntur. Cum autem spatium sit ordo rerum simultanearum, apparet, in ipso hoc spatio præter illa discrimina, quibus unum ab altero differt, aliquam similitudinem adesse debere, qua omnes substantiæ & earum aggregata convenient. Totum sc. hoc universum ad gloriam divinam creatum esse cognovimus §. XVI. & sapienter quidem §. XV. n. 3. sed quoniam sapientis est, conformitatem maxime servare in mediis ad certum finem spectantibus, sic & Deus certa media & quidem optima huic ipsi mundo inseruit, quibus finem suum consequeretur ; finis est gloria Dei, medium, per quod ista se exsereret, est creatio mundi ; sapientem vero maxime decet, primario fini plures alios adjungere fines minus principales, & totidem sibi subordinare, quotquot ad primarium sufficient, mediis respectu paucissimis ; hæc ipse Deus fecit ; dum ipsa media, quibus in condendo mundo fuit usus, novi sint fines secundarii, & sic deinceps. Quam, quæso, admirabilis hic est nexus rerum simultanearum ? quantum sapientiæ Divinæ argumentum ? Habemus itaque in connexione rerum simultanea & discrimina & similitudines rerum : collectis pluribus convenientiis habemus species, collectis pluribus speciebus ad genera ascendimus ; & sic emergit nexus rerum sibi invicem subordinatarum.

§. XXIV.

2. Ratione
temporis,

Datur autem alius nexus rerum sibi mutuo surrogatarum, sive, ut loqui consuevimus, ratione temporis. Talis autem nexus maxime id spectat, quomodo naturales rerum consecutiones ex causis suis procedant, & sic ea ratio obtinet, quæ est inter præcedentes causas ad suos effectus consequentes. Mutationibus obnoxium esse hunc mundum, & semper novam induere faciem, maxime quoad tempus ; id experientia dudum comprobavit ; sic ab infinito tempore ad nostram usque ætatem innumeræ inter res creatas successiones effluxere, & quot in posterum exhaustum iri putamus ? sed quemadmodum sibi ipsi simillimus est hic mundus, ita etiam arctissimo
nexu

nexu colligat omnia, quæ se invicem subsequuntur; sic ut semper in antecedente mundi statu ratio sit invenienda, cur effectus aliquis eveniat: quæ quidem genealogia, innumeris diffusa ramis, usque ad Ens simpliciter necessarium extenditur, atque ita fit, ut omnia illa, quæ magnus ille rerum essentiator viva illa voce: Fiat! complexus est, sensim & ordine procedant, & virtuti suæ pares effectus edant. Huic ipsi rei tota Physica innititur, ut causas illas percurrat, quibus Phænomenon quod naturæ debet explicari; & egregie eo ipso nobis prospicit, dum nobis media præbet, quibus uti debeamus, quando e naturæ thesauris emolumentum aliquod velimus elicere; hæc ratio est, cur hoc inprimis tempore homines nostri plurimis sese laboribus exerceant, quoniam & justo tempore se id facere, & naturam sibi obedientem habere dudum cognoverunt. Et proinde intelligi potest, quid sibi velit nexus rerum universalis, qui & connexiones spatii & temporis simul requirit. Hinc rectissime Ill. Wolff. in Annot. Metaph. §. 176. eam definitionem tradit, quod nexus rerum materialium sit dependentia a causis finalibus & efficientibus; finales quidem in rebus simultaneis, efficientes autem in rerum successione locum inveniunt.

§. XXV.

Cum inter successiones rerum non sit dispar effectus inter similes casus, sed iisdem positis circumstantiis idem semper effectus appareat, nihil magis naturale est, quam ut statuamus, Deum omnes mutationes mundi atque effectus sub certas classes distribuisse, quarum uni quivis effectus respondere debeat; voluit igitur, eam inter res creatas harmoniam esse atque concentum, ut omnia divinis regulis conformiter agant, atque in eo finibus Divinis satis fiat. Et quoniam omnis res eo est perfectior, quo magis cum regulis conspirat; apparet, eo perfectionem esse hunc nexum universalem, quo plura ex legibus hisce, a Deo naturæ præscriptis queant explicari. Et hinc intelligi potest, quænam sint istæ motuum leges, quibus omnes corporum functiones ordina-

Extensio huius
nexus,

riæ determinantur ; nimirum iste rerum contingentium ordo , quem mundus in mutationibus suis observat. Sumimitur autem mundus hic latiori sensu, neque enim solus hic, quem incolimus, globus terraqueus unum mundum constituit, simul ad illum totum hoc universum, tam systema Planetarium, quam immensum illud spatium, fixis impletum, pertinere arbitror. Lunam quidem satellitem, quæ noctu solis instar nobis est, insignem hic habere influxum constat : inter fixas si solem nominemus, quænam sint illius actiones tam circa reliquos planetas, quam circa terram, ipso sole clarius patet ; simili modo reliquas stellas huc refero ; nam & illæ suis relationibus cum mundo, & secum invicem conspirant. Mundus igitur est totum aliquod, quod internum suum habet principium, ex quo omnes mutationes per motum derivantur. Corpora quidem mundi totalia moveri, dudum cognoverunt eruditi, cum primis Hugenus ; verum id est in omni systemate, sive planetas circa solem cum Copernico, sive solem circa planetas moveri statuamus ; apud corpora mundi partialia id indubium non est, quoniam materia corporis, seu vis inertiae, id non videtur permissura ; interim & in illis motus quispiam internus est : corpus enim gravitate sua semper versus centrum terræ agit, quamvis plane videatur quiescere ; & deinde primitiva illa corpuscula semper in semet invicem agunt ; cum primum enim sibi invicem conjuncta sunt, & nulla ratio est, cur a se separentur, actione sua interna semper cohærescunt ; qui motus vocatur internus.

§. XXVI.

Leges motuum nullam inferunt necessitatem.

Quoniam istæ regulæ magnum aliquod momentum trahunt in hoc, quod agimus argumento ; inquiremus sollicitè, num istæ leges motuum sint vel necessariae, vel contingentes ; quas si necessarias esse cognoverimus, tota hæc doctrina, & simul naturalis Theologiæ fundamentum corruet : in rebus creatis præter essentiam nihil cogitare licet necessarium, quapropter num in essentia fundentur hæ leges, dispiciendum est : essentia mundi in modo compositionis certarum partium consistit ;

stit; ex qua quidem notione apparet, nullam esse repugnantiam, essentiaẽ certam quandam vim tribuendi, quam sequantur omnes mutationes: qualis autem illa vis, quale principium esse debeat, per essentiam mundi non determinatur. Ex quo apparet, leges hasce motuum fundari quidem in essentia mundi, sed istas non unice tantum possibiles esse pariter conicimus; non igitur ex rigore Geometrico, vel absoluta necessitate ortum suum trahunt. Tametsi vero non absolute necessarias esse has leges motuum facile perspexerimus, quamvis de necessitate conditionata nemo dubitet) non tamen in alterum illud extremum delabi debemus, ut statuamus, regulas istas respectu Dei prorsus esse indifferentes: supra enim §. XIX. perspeximus, neque in Entibus, intellectu suo limitatis, locum invenire talem quandam indifferentiam, quod in Deo eo clarius apparet, quo magis Divinus intellectus inter humanam imbecillitatem eminet; in hominibus enim illud quandoque determinationem impedit, quod non omnes rationes simul perspicere possumus, Deus omnia distincte & adæquate cognoscit: Elucet igitur in Deo summa sapientia, quam pro fundamento habemus, cur ipse has præcipue motuum leges eligendas existimaverit; qui ex hac Dei perfectione necessitatem conantur exsculpere, illi apparentem pro vera, moralem cum absoluta necessitate, infelici iudicio, commiscent. Quamvis enim inter plurima possibilia, quæ Intellectus Divinus purissime sibi repræsentat, unicum tantummodo possit esse optimum; non est tamen hoc ipsum unice eligibile, nisi respectiva illa necessitate morali, quam felicem atque beatam esse necessitatem jure pronuntiavit Leibnitius. Dum igitur istæ leges non sint absolutæ necessitatis, nec per essentiam mundi unice determinantur; videmus, distinguenda esse hæc duo; essentiam atque vim internam motricem; adeoque omnia, quæ sunt in mundo, explicari posse vel ex essentia mundi, vel ex legibus motus, quæ sunt & generales, & specificæ. Atque sic omnino recedimus ab opinione illa dudum profligata, quod corpus sit indifferens ad motum & quietem, cum supra jam fundamentum Cartesii everterimus §. V. cui erat innixa.

§: XXVII.

§. XXVII.

Discrimen
inter certi-
tudinem &
necessitatem

Cum primum itaque mundus is esse coepit, qualem nunc experimur, ex eo rerum initio certum factum est, futura esse hæc omnia, quæ ætatem nostram antecesserunt, & quæ eandem consequentur; dum enim ex pluribus possibilibus hunc mundum producere Deus secum constituit; exercitium Divinæ omnipotentia, in condendo hoc universo applicatæ, ad omnia illaabilia extenditur, quæ in hoc mundo involvuntur, & eo quidem sensu certum est, futura etiam esse consequentia, ex rationibus nimirum objectivis. In eo quidem conspirant omnes Philosophi nostræ ætatis, veritatem rerum futurarum esse determinatam jam a creatione hujus mundi, & consequenter jam nunc vera esse illa omnia, quæ post hoc tempus fient, quoniam jam in præsentis statu mundi ratio illorum quamvis remotissima possit inveniri: quin etiam ipsi homines actionibus suis futura determinant, quoniam hic nexus cum futuro conjunctus est, & omnes naturæ effectus ex virium causæ determinatione sequuntur. Quemadmodum vero istæ actiones hominum nihil absolute necessarium in se complectuntur §. XIX. sic etiam effectus, inde derivandi nullam postulabunt. Futurum certe nihil obesse potest contingentia; demonstrari enim antea deberet, mundum hunc secundum originem suam esse necessarium; quod secus se habere supra parte prima vidimus. Res igitur futuræ sunt omnia illaabilia, quæ ad hunc mundum pertinent, quarum existentia quidem est certa, sed ad quam producendam plures adhuc præparationes requiruntur, ut possint physice existere. Sic itaque verum est atque certum, futura esse consequentia, quoniam illorum ratio sufficiens in hoc rerum nexu continetur; sed quatenus existentia non ingreditur essentiam mundi, eatenus futura non sunt necessaria, sed contingentia; sicut in Machina omnia sensim & ordine evolvuntur, quibus destinata est, necessitate hypothetica; sic in mundo futura sunt certa atque determinata. Sunt autem complures, qui vix audita voce Machinæ mundum fingunt

tingant esse necessarium, nec machinam naturalem ab artificiali satis discernunt: neque enim hoc dicimus, quod mundus in omnibus conveniat cum machinis, sed in isto tertio tantum, quod utraque motu suo interno gaudeat; hinc invertendum potius est argumentum; quoniam artificiales istæ machinæ sint imitatrices naturæ, quæ sola revera est machina; & quia mundi mutationes a substantiis agentibus liberis, intelligentibus maximam partem determinantur; in reliquis machinis necessario fiunt omnia. Et sic contingentia mundi ratione legum motus semper salva manet.

§. XXIX.

Aliud quoddam argumentum obstat, quod de omniscientia Divina derivatur; nostrum erit hac in parte spicilegium instituere, quoniam diu multumque agitata est hæc controversia, nec nunc plane conquievit. Summas nimirum intellectui Divino perfectiones tribuimus, qui per omniscientiam ita determinatur, ut omnia possibile adæquate & simul sibi repræsentet: Cum autem possibile sint duplicis generis, alia quæ ad hunc mundum pertinent, & certo eveniunt §. XXVII, alia quæ ad existentiam nunquam promoventur; patet intellectum Divinum hæc omnia pro objectis adæquatæ repræsentationis habere, atque ita scientia divina vocatur scientia visionis, & scientia media; quatenus res singulas extra nexum sibi repræsentat, eatenus ipsi tribuitur scientia simplicis intelligentiæ. De scientia visionis loquimur, quoniam de cognitione futurorum sermo nobis est: atque eo sensu recte dicitur, omniscientiam Divinam falli neutiquam posse; quoniam ipse Deus res sibi invicem coordinando atque subordinando nexum rerum universalem constituit, & uno obtutu perscrutatur omnia; & quia res ita cognoscit, uti sunt per nexum rerum objective determinatæ ad existentiam sub certis circumstantiis. At vero si exinde necessitatem velis inferre rebus creatis, vereor, ne error subnascat; neque enim ideo res ita fiunt, quia Deus easdem prævidet: sed ideo Deus sibi res ut futuras repræsentat, quia rationes in objectis adesse, exacte cognoscit. Ponamus enim aliquantisper, omniscientiam Divinam

Illustratur
exemplo
omniscien-
tiæ.

esse rationem sufficientem, cur hi sequantur effectus nec alii, neque in objectis aliquam contineri; tum vero ex subjectivis rationibus fient omnia; non igitur aliud in Deo fundamentum hujus scientiæ est quam id, quod Deus ab æterno ita decreverit; ut nimirum omniscientia ex decreto Divino dependeat, qua quidem sententia suffragaremur iis, qui absolutam prædestinationem fingunt. Proinde ratio futuræ existentiae simul est in objecto possibili; consequenter illam vel in possibili, qua tali, poneremus, quod vero esset a possibilitate ad existentiam concludere; vel ratio petenda est in possibili, quatenus in hoc nexu spectatur; hoc vero posteriori sensu obtinemus id, quod volumus. Igitur res futuræ fiunt ex rationibus objectivis; proinde non in omniscientia Dei sola fundantur; & hinc jure statuimus, omniscientiam Divinam nullam inferre rebus creatis necessitatem.

§. XXIX.

Objectio
solvitur.

Sed ex diverticulo in viam redeundum est; de regulis motuum diximus, atque illas non absolute necessarias esse cognovimus ex eo, quia non in essentia mundi continentur, & proinde sunt mutabiles. Si quis autem evicerit, ipsam mutabilitatem esse posse simpliciter necessariam, ut & in consecutione rerum ipsa alia aliis ferrea necessitate succedant, næ is omne robur argumenti nostri, quo jam §. IV. contingentiam mundi confirmare voluimus, prorsus enervabit. Sed res est in salvo: nam mutabilitas, secundum possibilitatem mundi internam, vel essentiam, omnino necessaria est simpliciter: secundum existentiam vero mutabilitas a contingentia separari non potest; atque sic mundo contingentia restituitur. Et sane non melius Spinoza consulere sibi potuisset, quam pestilentissima illa Thesi: quod hoc universum sit ipse Deus; qua quidem id efficere conatus est, omnes mundi mutationes, atque ceteras res existentes esse veluti modificationes unius substantiæ necessariæ i. e. mundi, ac deinde impossibilitatem miraculorum ex eo derivavit fonte. Sed confutatus est hætenus iis exemplis, quæ per experientiam negare ipse non poterat, mundus enim est extensus, quæ quoniam nulla est absoluta perfectio,

atio, in Deum sane non potest cadere: nam extensio non est realitas, quæenti cuidam inest, sed supponit aliam realitatem vi cuius, confuse perceptæ, adesse apparet ait Ill. Wolff. theol. nat. P. II, §. 689. Atque ipsum extensionis exemplum simul illam opinionem evertit, quæ mundum esse unicam substantiam putat; cum extensio nihil sit aliud, quam complexus rerum innumerarum, cuius vires sæpissime sibi invicem sunt oppositæ, & hinc pro una eademque substantia haberi non possunt; vires enim oppositæ in una substantia locum habere non possunt. Infinitum quidem esse hunc mundum negari non potest ratione extensionis, an id verò Deo sufficere statuamus? minime gentium; neque enim ita tantum infinitus esse Deus potest; quin potius in illa idea infinitudo sensu Metaphysico accipitur uti §. III. quæ nimirum in omnitudine sibi compossibilium perfectionum consistat; non autem sensu Mathematico, qui tantummodo infinitatem ratione molis sive extensionis considerat. Plura de his dicenda essent, sed non ex instituto illum refutamus atheum.

§. XXX.

Interim in generali decisione putem plurimas difficultates inde sub natas esse, quia essentiam mundi atque ejusdem naturam pro una eademque habuerunt, quæ solícite tamen a se invicem fuissent distinguenda. Per usum loquendi discimus, illud apud nos dici naturale, quod sui rationem sufficientem habet in hoc rerum nexu; ordo, quem hic mundi nexus in suis mutationibus constanter observat, nititur illis generalibus legibus, quas motui Deus præscripsit; leges autem istæ quoniam non sunt absolute necessariae §. XXVI. igitur ad mundi essentiam pertinere non possunt. Atque ita quemadmodum effectus mundi in essentia illius quærendi sunt, nam quivis alius compositionis modus alios effectus prodit; ita in consecutione rerum animus ad regulas motuum applicandus est; consequenter cursus naturæ est series omnium illorum eventuum, qui in essentia mundi atque in legibus motus sui rationem sufficientem habent. Quidquid igitur non in legibus motus sui rationem habet sufficientem, illud vel plane non fit,

Contingen-
tia cursus
naturæ.

vel si existit, sane supra naturam illud est ; atque sic perspicuum est, si cursus naturæ tolli debeat, illum per suspensionem legum motus tolli ; leges autem istas suspendi revera posse, per contingentiam earum jam implicite diximus ; & proinde cursus naturæ est mutabilis.

§. XXXI.

Possibilitatem miraculorum probat.

Id quod cursui naturæ e diametro opponitur, miraculum alias dici solet ; & cum oppositum cursus naturæ sit possibile, eo ipso possibilitas miraculorum patet ; atque sic a priori obtinuimus id, quod per experientiam demonstrare rigor Philosophicus non semper permittit, quamvis vera & realia miracula sacræ literæ abunde testentur. Ex dictis vero facillime patet, eventum quendum rarum atque insolitum neutiquam dici miraculum posse ; raritas enim casuum neutiquam impedit, quo minus rem ex naturæ vi possimus derivare, quod secus habet in miraculis. Habent hunc errorem permulti cum plebe communem, ut in rebus non semper obviis statuunt miracula, quotiescunque visum fuerit, ipsi cæca imaginationis fraude toties illusi, sic sæpe numero nova Phænomena, cometas vel alia id generis plura immediate nunc demum ab omnipotentia Divina profecta, consequenter pro miraculis, vel signis tristium eventuum, mundo imminentium habenda esse anili superstitione putant, quo quidem sensu minime intelligi velim id, quod supra §. XXV. diximus, quoniam relationes illæ, quas alii planetæ ad hunc orbem habent, sunt mere extrinsecæ, nec unum pro signo alius assumi potest. Atque hic mirifice iterum falli Spinozam videmus, Tract. polit. cap. 6. ita differentem : „ nomen miraculi non nisi respective ad „ hominum opiniones posse intelligi, & nihil aliud significare, „ quam opus, cujus causam exemplo alterius rei solitæ explicare non possimus. Nititur enim hæc sententia falso præsupposito, ac si illud nobis sit miraculum, cujus rationem sufficientem ignoremus ; absit longissime ! dantur enim in Physica variæ instantiæ, quorum ratio quamvis nos fugiat, pro miraculo tamen non habentur. Quis e, g. vim Electricam su-

pra

pra naturæ vires positam esse existimet, ea propter, quia causa illius occulta adhuc est? Quin potius illud sano sensu miraculum vocamus, quod sui rationem plane non habet in illis regulis, quas operationes rerum contingentium sequi solent ordinarie; male enim nobiscum ageretur, si omnia illa diceremus miracula, quorum causam exemplo rei solitæ explicare non possumus; atque in eo pares nos exhiberemus obscuro illi seculo, ubi omnia, quæ vel mediocrem attentionem merebantur, pro miraculis fuere venditata; si non potius per impossibilitatem physicam miraculum agnoscere possemus.

§ XXXII.

Atque hæc de contingentia mundi corporei ratione conclusionis rerum sufficiant; nunc iterum ad regnum spirituum finitorum convertimur, & de his paucis adhuc videamus. Supra quidem sermo jam de illis erat instituendus, quia contingentia actionum humanarum ex prima mundi constitutione derivanda erat, plura ibidem edifferere non licuit; nunc in ordine successionis rerum plura adhuc ad illum locum pertinentia enumerabimus. Spiritus finiti ab infinito in eo potissimum differunt, quod illi, quidquid cogitant, successive ex legitimis præmissis, ab intellectu probe ponderatis, deducant; quod infinitus spiritus simplici agit actu: interim successiones istæ non inordinate sine ullo nexu producuntur, & proinde suas etiam leges sequuntur certas atque determinatas; quas & duplici respectu contingentes esse oportet, quoad productionem atque successiones suas. Tametsi vero id extra omnem dubii aleam sit positum per ea, quæ hætenus demonstrare conati sumus; nihil tamen amplius exinde sequitur, quam contingentes esse illas, quibus anima fungitur, actiones, sed num a contingentia illarum ad libertatem liceat concludere, incertum est hætenus: sufficit contingentia in mundo corporeo, in spirituum actionibus non ita se res habet; potest enim in mundo corporeo res quædam in se contingens esse, quamvis sub certa conditione effectus necessario sequatur, idque sine detrimento contingentia, jam

*Animæ
actiones si-
mul contin-
gentes sunt
& liberæ.*

si nulla excellentior facultas animæ competeret, de libertate illius valde dubitandum esset. Nam istæ successiones in anima pertinent quam maxime ad nexum illum, qui est inter repræsentationes atque appetitus animæ, quorum posterior non contingenter tantum (quod idem esset atque necessitas hypothetica) sed & libere debet animæ competere, quod nisi evicerimus, victas illis manus dabimus, qui animam in machinas converti putant, cum primum quæstio de successione appetituum subnata fuerit. Conferamus paulisper mundum ut machinam cum anima, & discrimen evolutius patebit: ut primum apte inter se dispositis partibus motu suo fertur machina, tum in illa fiunt omnia, quæ per modum compositionis sunt possible; cum interim anima non promiscue omnia ex se evolvat, sed ea tantum exsequatur, quæ videntur optima. Palmaria igitur illa erit differentia, quod utraque quidem ex principio agit intrinseco, sed summo opere diverso; nam principium illud machinis intrinsecum est illa vis motrix, quæ partibus illius indivulsa serie motum communicat; illud vero principium, ex quo actiones fluunt animæ, in vi repræsentativa ponitur; quæ repræsentationes in nexu spectatæ vel iterum repræsentationes gignunt, & hac in parte conspirant cum machinis, quas proinde etiam necessarias esse ipsi nos concedimus; vel repræsentationem animæ appetitus excipit, quem liberum esse fatemur: intellectus enim in repræsentatione distincta positus, ut in relatione cum aliis rem quandam considerat, & ab aliis distinguit, per naturam suam, & si in illa subsistat, nihil fit, usque dum voluntas unum præ alio eligit, adeoque semet ipsam determinat. Lex, qua se voluntas determinare solet, generalis in electione optimi consistit; sed eo ipso est libera, quia vel plane non eligere, vel alium decernere potest, nam lex ista animæ non imperat necessario, quoniam sæpe numero nescio quo torpore adstricti actiones nostras suspendendo omittimus optimum factu; quando intellectus meliora videt probatque, deteriora vero voluntas sequitur: intellectus enim suadet tantum, voluntati nihil de jure suo derogaturus. Et proinde contingenter simul & libere anima actionibus suis defungi solet.

§. XXXIII.

Sed quemadmodum nihil hic egisse videntur ii, qui animæ appetitibus necessitatem inferre conati sunt, eo, quod series successionum certæ ipsi sint innatæ; sic alteram quoque phalangem adoriuntur, & plane omnem ex anima nexum collunt. Assumit enim casum Bælius, quo meditationes nostræ repentina quadam sensatione interrumpantur, atque ita nostro gladio illam Thesin jugulare conatur, quod natura nihil faciat per saltum; hic vero apertum esse saltum existimat, cum ex abrupto ab una repræsentatione veniamus ad aliam, hæc toto cœlo diversam. Equidem & novam hanc sensationem cum aliis legitimo nexu conjunctam esse reor, sed id, quod nexum cum statu antecedente non perspicimus, inde pendet, quia aliis rebus intenti, animoque ab externis rebus abstrahente, nexum novæ sensationis non attendimus. Et proinde nullum saltum cogimur admittere, quoniam ordo præsentationum animæ sibi semper est similis: anima enim quatenus est in classe spirituum, eatenus habet repræsentationes distinctas, quatenus autem est anima corporis, eatenus habet repræsentationes limitatas, id est, distinctas confusis, claras obscuris commistas: nova igitur ratio, cur de nexu earum dubitare in mentem veniat, evolvitur, si e. g. distinctam vel claram obscura excipit notio, cujus quoniam nobis conscii non sumus, ideo nullam adesse interdum statuimus, veruntamen sic perpetuo atque ordinatissimo nexu colligata sunt omnia. Hæc sunt illa, quæ pro instituti nostri ratione protulisse sufficiat; ratio & modus, quo ex infinita rerum congentium serie ad Ens simpliciter necessarium adscendimus, notior est, quam qui denuo hic inculcetur; quoniam non tam existentiam Dei demonstrare, quam viam modo illi investigandæ munire, hac vice constituimus.

Quamvis
connexæ
sint leges
successio-
num appeti-
tus.

F I N I S.

PRÆ.

PRÆSES

Ad præstantiss. Dn. Respondentem
Auctorem.

Vernacula nuper poësi, in laudem Serenissimi
publicata, ingenii edideras specimen. Nunc,
discursu philosophico, judicii Facultatem reddis testa-
tam. Hæc animi dona veluti Conjuges sistunt: quo-
rum alterum mariti, alterum, uxoris personam ge-
rit. Ut connubium utriusque in theologia, suo mox
tempore adtingenda, fecundum sit: DEum enixis
precibus rogo, atque exoro.



Laxas, ligas heic. Aurea vincula,
Quæ, vinciunt dum, compede nos simul
Fati trucis solvunt, feracis
Optio quo premitur Sophiæ.

Stat firma lex hæc: vult homo, nam volet,
Quod vult. Elater nam stimulat lubens:
Nectis tibi laurus, Amice,
Sortis & hinc Faber es virentis.

Hisce paucis præstantiss. dn.
auctori, commilitoni sua-
vissimo, gratulantur.

Compromotionales.